

Di Padoa, dil provedador zeneral, di cri sera. Come i nimici sono in moto certo di levarsi del Polesene, et par se intendino ben col ducha di Ferrara, et si spende li in campo assa' monede ferarese, et è di danari hanno tochado di la paga meza auta; et altri avisi sopra questo.

Di Crema, di sier Bortolo Contarini capitano e provedador, di 13. Come se li provedi di danari aziò possino comprar biave. Si dice el signor Prospero Colona vien con zente a conzonzarsi con il vicerè, et risona la fama ch'el re di Spagna sia morto; la qual nova non è vera, et è una zanza.

Da poi disnar, fo Pregadi et leto le soprascrite letere et quelle di Roma, e fo sacramentà el Consejo per l'avisò il Re non vol dar il reame etc.; in le qual letere di Roma è coluquii auti col cardinal Corner.

Fo publicato che il reverendo domino Piero Grimani di sier Antonio el procurator à prestado a la Signoria ducati 1000; sier Francesco Foscarei el consier qu. sier Filippo procurator ducati 1000; sier Alvixe Pixani el consier *dal Banco* ducati 1000.

Noto. Fo mandato a Trevixo, di questi, ducati 1000 al capitano di le fantarie per compir di pagar le so' zente.

70* Fu posto, per li 5 Proveditori sora la merchadantia sier Andrea Foscarini, sier Vettor Pixani, sier Andrea Baxadona, sier Alvixe Malipiero et sier Alvixe di Prioli, una letera al re de Ingaltera, exortando Soa Maestà a levar l'angaria messa di corone do per bota a' nostri, quando nui metesemo ducati 4 per bota a li vini di Candia si trazeva per là, qual nui levasemo a compiasentia di Soa Maestà, credendo il simile quella dovesse far, e non innovar altra cossa aziò nostri possino venir a mercadantar de li, *tamen* non fece, et questo è causa molti recusano usar quel viazo; per tanto pregemo Soa Maestà voy levarla etc. Ave una di no, 161 di si et fu presa; ma il Re non farà nula, perchè li torna ben, et altre volte li fo scritto et nulla volse far di levarla.

Fu posto, per li ditti, che *de cætero* tutti li nostri zentilhomeni e cittadini, per li ogii et altre robe vieneno in questa terra di Puia, Calabria e la Marca e altri lochi dentro el Golfo, siano a quella instessa condition nel pagar di le decime che sono forestieri, si in tempo di guera, come in tempo di pace: 24 di no, 151 di si.

Fu posto, per sier Bernardo Barbarigo consier e savio, ch'el sia scritto al rezimento di Candia, debino far proclamar che tutti quelli si vorà francar di danari de li teradegi di quella camera, possino in

termine zorni 8, a raxon di 5 per 100, exborsando *immediate* el dinaro, e quelli prima exborsarono siano li primi francati. E perchè di questi il clero di Candia ha la sua decima, sia preso che la dita decima si pagi ogni anno da la camera di Candia, e li danari si trovano si mandi di qui, ovvero a Corfù con una galia, *ut in parte*: 25 di no, 116 di si.

Fu posto, per li ditti Provedadori, che li fostagni cremonesi, quali al tempo Cremona vene sotto la Signoria nostra li fo concesso per capitoli a quella comunità potesseno condurli di 10 Fevrer 1499 in questa terra, che prima per leze non potevano; la qual cossa ha deviato li fostagni si fevano di qui, et hora Cremona non è più nostra, sia preso che ditti fostagni non possino esser conduti, *ut in parte*. A l'incontro, sier Antonio Trun procurator, savio dil Consejo, messe, atento il bisogno di la caxa di l'Arse- neral di aver fostagni, li ditti possino esser conduti come si fa al presente: etc. et parlò ditto sier Antonio Trun; li rispose sier Alvixe Malipiero qu. sier Stefano procurator, uno di Provedadori sora il navegar e la mercadantia. Andò le parte, et fu presa, *videlicet* il Trun ave 57 e li Proveditori 113, una di no et una non sinciera, con questa però condition presa, che li fostagni sono in questa terra cremonesi, si possino vender.

Fu posto, per i Savii, che sier Piero Arimondo, è capitano in Cadore, possi spender in conzar quel castello e fortificarlo fin ducati 50: 29 di no, 133 di si.

Fu posto, per i Savii dil Consejo et di terra ferma, che uno Zupan da Cervichal, qual però senza licentia di rectori nostri andò per tuor quel castello et redurlo a la pristina devution di la Signoria nostra, per la qual cossa è stà privo di luce, come in le letere dil podestà e capitano di Cao d'Istria si vede: per tanto sia preso ch'el preditto habbi in vita soa ducati do al mexe di provision a la camera di Cao d'Istria. Ave 4 di no, 145 di si, e fo presa.

Fu posto, per i Savii dil Consejo e terra ferma, che uno capo di stratioti nominato Lazaro Crano, qual al tempo di sier Antonio Bon provedador in Albania e sier Antonio Contarini provedador in Albania, atento li soi meriti, li fo dato provisione ducati 12 al mese: che la predita provision li sia confirmata, stando a' servizi di la Signoria nostra, qual è al presente a' nostri stipendi; et partendosi, l'habbi *etiam* la predita provision a rason di page 4 a l'anno a la camera nostra di Candia: 3 non sinciere, 19 di no, 139 di si; è presa.

Fu posto, per li Savii tutti, scriver al baylo di